

AD ROMANOS

Capitulum: [1](#) [2](#) [3](#) [4](#) [5](#) [6](#) [7](#) [8](#) [9](#) [10](#) [11](#) [12](#) [13](#) [14](#) [15](#) [16](#)

CAPITULUM 1

Paulus servus Christi Iesu vocatus apostolus segregatus in evangelium Dei
² quod ante promiserat per prophetas suos in scripturis sanctis
³ de Filio suo qui factus est ex semine David secundum carnem
⁴ qui praedestinatus est Filius Dei in virtute secundum Spiritum sanctificationis ex resurrectione mortuorum Iesu Christi Domini nostri
⁵ per quem accepimus gratiam et apostolatum ad oboediendum fidei in omnibus gentibus pro nomine eius
⁶ in quibus estis et vos vocati Iesu Christi
⁷ omnibus qui sunt Romae dilectis Dei vocatis sanctis gratia vobis et pax a Deo Patre nostro et Domino Iesu Christo
⁸ primum quidem gratias ago Deo meo per Iesum Christum pro omnibus vobis quia fides vestra adnuntiatur in universo mundo
⁹ testis enim mihi est Deus cui servo in spiritu meo in evangelio Filii eius quod sine intermissione memoriam vestri facio
¹⁰ semper in orationibus meis obsecrans si quo modo tandem aliquando prosperum iter habeam in voluntate Dei veniendi ad vos
¹¹ desidero enim videre vos ut aliquid inperit gratiae vobis spiritalis ad confirmandos vos
¹² id est simul consolari in vobis per eam quae invicem est fidem vestram atque meam
¹³ nolo autem vos ignorare fratres quia saepe proposui venire ad vos et prohibitus sum usque adhuc ut aliquem fructum habeam et in vobis sicut et in ceteris gentibus
¹⁴ Graecis ac barbaris sapientibus et insipientibus debitor sum
¹⁵ ita quod in me promptum est et vobis qui Romae estis evangelizare
¹⁶ non enim erubesco evangelium virtus enim Dei est in salutem omni credenti Iudaeo primum et Graeco
¹⁷ iustitia enim Dei in eo revelatur ex fide in fidem sicut scriptum est iustus autem ex fide vivit
¹⁸ revelatur enim ira Dei de caelo super omnem impietatem et iniustitiam hominum eorum qui veritatem in iniustitiam detinent
¹⁹ quia quod notum est Dei manifestum est in illis Deus enim illis manifestavit
²⁰ invisibilia enim ipsius a creatura mundi per ea quae facta sunt intellecta conspiciuntur sempiterna quoque eius virtus et divinitas ut sint inexcusabiles
²¹ quia cum cognovissent Deum non sicut Deum glorificaverunt aut gratias egerunt sed evanuerunt in cogitationibus suis et obscuratum est insipiens cor eorum

- ²² dicentes enim se esse sapientes stulti facti sunt
- ²³ et mutaverunt gloriam incorruptibilis Dei in similitudinem imaginis corruptibilis hominis et volucrum et quadrupedum et serpentium
- ²⁴ propter quod tradidit illos Deus in desideria cordis eorum in inmunditiam ut contumeliis adfician corpora sua in semet ipsis
- ²⁵ qui commutaverunt veritatem Dei in mendacio et coluerunt et servierunt creaturae potius quam creatori qui est benedictus in saecula amen
- ²⁶ propterea tradidit illos Deus in passiones ignominiae nam feminae eorum inmutaverunt naturalem usum in eum usum qui est contra naturam
- ²⁷ similiter autem et masculi relicto naturali usu feminae exarserunt in desideriis suis in invicem masculi in masculos turpitudinem operantes et mercedem quam oportuit erroris sui in semet ipsis recipientes
- ²⁸ et sicut non probaverunt Deum habere in notitia tradidit eos Deus in reprobum sensum ut faciant quae non conveniunt
- ²⁹ repletos omni iniquitate malitia fornicatione avaritia nequitia plenos invidia homicidio contentione dolo malignitate susurrones
- ³⁰ detractores Deo odibiles contumeliosos superbos elatos inventores malorum parentibus non oboedientes
- ³¹ insipientes inconpositos sine affectione absque foedere sine misericordia
- ³² qui cum iustitiam Dei cognovissent non intellexerunt quoniam qui talia agunt digni sunt morte non solum ea faciunt sed et consentiunt facientibus

CAPITULUM 2

- p**ropter quod inexcusabilis es o homo omnis qui iudicas in quo enim iudicas alterum te ipsum condemnas eadem enim agis qui iudicas
- ² scimus enim quoniam iudicium Dei est secundum veritatem in eos qui talia agunt
- ³ existimas autem hoc o homo qui iudicas eos qui talia agunt et facis ea quia tu effugies iudicium Dei
- ⁴ an divitias bonitatis eius et patientiae et longanimitatis contemnis ignorans quoniam benignitas Dei ad paenitentiam te adducit
- ⁵ secundum duritiam autem tuam et inpaenitens cor thesaurizas tibi iram in die irae et revelationis iusti iudicii Dei
- ⁶ qui reddet unicuique secundum opera eius
- ⁷ his quidem qui secundum patientiam boni operis gloriam et honorem et incorruptionem quaerentibus vitam aeternam
- ⁸ his autem qui ex contentione et qui non adquiescunt veritati credunt autem iniquitati ira et indignatio
- ⁹ tribulatio et angustia in omnem animam hominis operantis malum Iudaei primum et Graeci
- ¹⁰ gloria autem et honor et pax omni operanti bonum Iudaeo primum et Graeco
- ¹¹ non est enim personarum acceptio apud Deum
- ¹² quicumque enim sine lege peccaverunt sine lege et peribunt et quicumque in lege peccaverunt per legem iudicabuntur
- ¹³ non enim auditores legis iusti sunt apud Deum sed factores legis iustificabuntur

- 14** cum enim gentes quae legem non habent naturaliter quae legis sunt faciunt eiusmodi legem non habentes ipsi sibi sunt lex
- 15** qui ostendunt opus legis scriptum in cordibus suis testimonium reddente illis conscientia ipsorum et inter se invicem cogitationum accusantium aut etiam defendentium
- 16** in die cum iudicabit Deus occulta hominum secundum evangelium meum per Iesum Christum
- 17** si autem tu Iudaeus cognominaris et requiescis in lege et gloriaris in Deo
- 18** et nosti voluntatem et probas utiliora instructus per legem
- 19** confidis te ipsum ducem esse caecorum lumen eorum qui in tenebris sunt
- 20** eruditorem insipientium magistrum infantium habentem formam scientiae et veritatis in lege
- 21** qui ergo alium doces te ipsum non doces qui praedicas non furandum furaris
- 22** qui dicis non moechandum moecharis qui abominaris idola sacrilegium facis
- 23** qui in lege gloriaris per praevaricationem legis Deum inhonoras
- 24** nomen enim Dei per vos blasphematur inter gentes sicut scriptum est
- 25** circumcisio quidem prodest si legem observes si autem praevaricator legis sis circumcisio tua praeputium facta est
- 26** si igitur praeputium iustitias legis custodiat nonne praeputium illius in circumcisionem reputabitur
- 27** et iudicabit quod ex natura est praeputium legem consummans te qui per litteram et circumcisionem praevaricator legis es
- 28** non enim qui in manifesto Iudaeus est neque quae in manifesto in carne circumcisio
- 29** sed qui in abscondito Iudaeus et circumcisio cordis in spiritu non littera cuius laus non ex hominibus sed ex Deo est

CAPITULUM 3

Quid ergo amplius est Iudaeo aut quae utilitas circumcisionis

- 2** multum per omnem modum primum quidem quia credita sunt illis eloquia Dei
- 3** quid enim si quidam illorum non crediderunt numquid incredulitas illorum fidem Dei evacuabit absit
- 4** est autem Deus verax omnis autem homo mendax sicut scriptum est ut iustificeris in sermonibus tuis et vincas cum iudicaris
- 5** si autem iniquitas nostra iustitiam Dei commendat quid dicemus numquid iniquus Deus qui infert iram secundum hominem dico
- 6** absit alioquin quomodo iudicabit Deus mundum
- 7** si enim veritas Dei in meo mendacio abundavit in gloriam ipsius quid adhuc et ego tamquam peccator iudicor
- 8** et non sicut blasphemamur et sicut aiunt nos quidam dicere faciamus mala ut veniant bona quorum damnatio iusta est
- 9** quid igitur praecellimus eos nequaquam causati enim sumus Iudaeos et Graecos omnes sub peccato esse
- 10** sicut scriptum est quia non est iustus quisquam
- 11** non est intellegens non est requirens Deum
- 12** omnes declinaverunt simul inutiles facti sunt non est qui faciat bonum non est usque ad

unum

13 sepulchrum patens est guttur eorum linguis suis dolose agebant venenum aspidum sub labiis eorum

14 quorum os maledictione et amaritudine plenum est

15 veloces pedes eorum ad effundendum sanguinem

16 contritio et infelicitas in viis eorum

17 et viam pacis non cognoverunt

18 non est timor Dei ante oculos eorum

19 scimus autem quoniam quaecumque lex loquitur his qui in lege sunt loquitur ut omne os obstruatur et subditus fiat omnis mundus Deo

20 quia ex operibus legis non iustificabitur omnis caro coram illo per legem enim cognitio peccati

21 nunc autem sine lege iustitia Dei manifestata est testificata a lege et prophetis

22 iustitia autem Dei per fidem Iesu Christi super omnes qui credunt non enim est distinctio

23 omnes enim peccaverunt et egent gloriam Dei

24 iustificati gratis per gratiam ipsius per redemptionem quae est in Christo Iesu

25 quem proposuit Deus propitiationem per fidem in sanguine ipsius ad ostensionem iustitiae suae propter remissionem praecedentium delictorum

26 in sustentatione Dei ad ostensionem iustitiae eius in hoc tempore ut sit ipse iustus et iustificans eum qui ex fide est Iesu

27 ubi est ergo gloriatio exclusa est per quam legem factorum non sed per legem fidei

28 arbitramur enim iustificari hominem per fidem sine operibus legis

29 an Iudaeorum Deus tantum nonne et gentium immo et gentium

30 quoniam quidem unus Deus qui iustificabit circumcisionem ex fide et praeputium per fidem

31 legem ergo destruimus per fidem absit sed legem statuimus

CAPITULUM 4

Quid ergo dicemus invenisse Abraham patrem nostrum secundum carnem

2 si enim Abraham ex operibus iustificatus est habet gloriam sed non apud Deum

3 quid enim scriptura dicit credidit Abraham Deo et reputatum est illi ad iustitiam

4 ei autem qui operatur merces non inputatur secundum gratiam sed secundum debitum

5 ei vero qui non operatur credenti autem in eum qui iustificat impium reputatur fides eius ad iustitiam

6 sicut et David dicit beatitudinem hominis cui Deus accepto fert iustitiam sine operibus

7 beati quorum remissae sunt iniquitates et quorum tecta sunt peccata

8 beatus vir cui non inputabit Dominus peccatum

9 beatitudo ergo haec in circumcissione an etiam in praepotio dicimus enim quia reputata est Abrahae fides ad iustitiam

10 quomodo ergo reputata est in circumcissione an in praepotio non in circumcissione sed in praepotio

11 et signum accepit circumcisionis signaculum iustitiae fidei quae est in praepotio ut sit pater omnium credentium per praepotium ut reputetur et illis ad iustitiam

- ¹² et sit pater circumcisionis non his tantum qui sunt ex circumcissione sed et his qui sectantur vestigia quae est in praeputio fidei patris nostri Abrahae
- ¹³ non enim per legem promissio Abrahae aut semini eius ut heres esset mundi sed per iustitiam fidei
- ¹⁴ si enim qui ex lege heredes sunt exinanita est fides abolita est promissio
- ¹⁵ lex enim iram operatur ubi enim non est lex nec praevaricatio
- ¹⁶ ideo ex fide ut secundum gratiam ut firma sit promissio omni semini non ei qui ex lege est solum sed et ei qui ex fide est Abrahae qui est pater omnium nostrum
- ¹⁷ sicut scriptum est quia patrem multarum gentium posui te ante Deum cui credidit qui vivificat mortuos et vocat quae non sunt tamquam ea quae sunt
- ¹⁸ qui contra spem in spem credidit ut fieret pater multarum gentium secundum quod dictum est sic erit semen tuum
- ¹⁹ et non infirmatus fide consideravit corpus suum emortuum cum fere centum annorum esset et emortuam vulvam Sarrae
- ²⁰ in repromissione etiam Dei non haesitavit diffidentia sed confortatus est fide dans gloriam Deo
- ²¹ plenissime sciens quia quaecumque promisit potens est et facere
- ²² ideo et reputatum est illi ad iustitiam
- ²³ non est autem scriptum tantum propter ipsum quia reputatum est illi
- ²⁴ sed et propter nos quibus reputabitur credentibus in eum qui suscitavit Iesum Dominum nostrum a mortuis
- ²⁵ qui traditus est propter delicta nostra et resurrexit propter iustificationem nostram

CAPITULUM 5

- I**ustificati igitur ex fide pacem habeamus ad Deum per Dominum nostrum Iesum Christum
- ² per quem et accessum habemus fide in gratiam istam in qua stamus et gloriamur in spe gloriae filiorum Dei
- ³ non solum autem sed et gloriamur in tribulationibus scientes quod tribulatio patientiam operatur
- ⁴ patientia autem probationem probatio vero spem
- ⁵ spes autem non confundit quia caritas Dei diffusa est in cordibus nostris per Spiritum Sanctum qui datus est nobis
- ⁶ ut quid enim Christus cum adhuc infirmi essemus secundum tempus pro impiis mortuus est
- ⁷ vix enim pro iusto quis moritur nam pro bono forsitan quis et audeat mori
- ⁸ commendat autem suam caritatem Deus in nos quoniam cum adhuc peccatores essemus
- ⁹ Christus pro nobis mortuus est multo igitur magis iustificati nunc in sanguine ipsius salvi erimus ab ira per ipsum
- ¹⁰ si enim cum inimici essemus reconciliati sumus Deo per mortem Filii eius multo magis reconciliati salvi erimus in vita ipsius
- ¹¹ non solum autem sed et gloriamur in Deo per Dominum nostrum Iesum Christum per quem nunc reconciliationem accepimus
- ¹² propterea sicut per unum hominem in hunc mundum peccatum intravit et per peccatum

mors et ita in omnes homines mors pertransiit in quo omnes peccaverunt

13 usque ad legem enim peccatum erat in mundo peccatum autem non inputatur cum lex non est

14 sed regnavit mors ab Adam usque ad Mosen etiam in eos qui non peccaverunt in similitudinem praevaricationis Adae qui est forma futuri

15 sed non sicut delictum ita et donum si enim unius delicto multi mortui sunt multo magis gratia Dei et donum in gratiam unius hominis Iesu Christi in plures abundavit

16 et non sicut per unum peccantem ita et donum nam iudicium ex uno in condemnationem gratia autem ex multis delictis in iustificationem

17 si enim in unius delicto mors regnavit per unum multo magis abundantiam gratiae et donationis et iustitiae accipientes in vita regnabunt per unum Iesum Christum

18 igitur sicut per unius delictum in omnes homines in condemnationem sic et per unius iustitiam in omnes homines in iustificationem vitae

19 sicut enim per inoboedientiam unius hominis peccatores constituti sunt multi ita et per unius oboedientiam iusti constituentur multi

20 lex autem subintravit ut abundaret delictum ubi autem abundavit delictum superabundavit gratia

21 ut sicut regnavit peccatum in morte ita et gratia regnet per iustitiam in vitam aeternam per Iesum Christum Dominum nostrum

CAPITULUM 6

Quid ergo dicemus permanebimus in peccato ut gratia abundet

2 absit qui enim mortui sumus peccato quomodo adhuc vivemus in illo

3 an ignoratis quia quicumque baptizati sumus in Christo Iesu in morte ipsius baptizati sumus

4 consepulti enim sumus cum illo per baptismum in mortem ut quomodo surrexit Christus a mortuis per gloriam Patris ita et nos in novitate vitae ambulemus

5 si enim conplantati facti sumus similitudini mortis eius simul et resurrectionis erimus

6 hoc scientes quia vetus homo noster simul crucifixus est ut destruatur corpus peccati ut ultra non serviamus peccato

7 qui enim mortuus est iustificatus est a peccato

8 si autem mortui sumus cum Christo credimus quia simul etiam vivemus cum Christo

9 scientes quod Christus surgens ex mortuis iam non moritur mors illi ultra non dominabitur

10 quod enim mortuus est peccato mortuus est semel quod autem vivit vivit Deo

11 ita et vos existimate vos mortuos quidem esse peccato viventes autem Deo in Christo Iesu

12 non ergo regnet peccatum in vestro mortali corpore ut oboediatis concupiscentiis eius

13 sed neque exhibeatis membra vestra arma iniquitatis peccato sed exhibete vos Deo tamquam ex mortuis viventes et membra vestra arma iustitiae Deo

14 peccatum enim vobis non dominabitur non enim sub lege estis sed sub gratia

15 quid ergo peccavimus quoniam non sumus sub lege sed sub gratia absit

16 nescitis quoniam cui exhibetis vos servos ad oboediendum servi estis eius cui oboeditis sive peccati sive oboeditionis ad iustitiam

- ¹⁷ gratias autem Deo quod fuistis servi peccati oboedistis autem ex corde in eam formam doctrinae in qua traditi estis
- ¹⁸ liberati autem a peccato servi facti estis iustitiae
- ¹⁹ humanum dico propter infirmitatem carnis vestrae sicut enim exhibuistis membra vestra servire inmunditiae et iniquitati ad iniquitatem ita nunc exhibete membra vestra servire iustitiae in sanctificationem
- ²⁰ cum enim servi essetis peccati liberi fuistis iustitiae
- ²¹ quem ergo fructum habuistis tunc in quibus nunc erubescitis nam finis illorum mors est
- ²² nunc vero liberati a peccato servi autem facti Deo habetis fructum vestrum in sanctificationem finem vero vitam aeternam
- ²³ stipendia enim peccati mors gratia autem Dei vita aeterna in Christo Iesu Domino nostro

CAPITULUM 7

- a**n ignoratis fratres scientibus enim legem loquor quia lex in homine dominatur quanto tempore vivit
- ² nam quae sub viro est mulier vivente viro alligata est legi si autem mortuus fuerit vir soluta est a lege viri
- ³ igitur vivente viro vocabitur adultera si fuerit cum alio viro si autem mortuus fuerit vir eius liberata est a lege ut non sit adultera si fuerit cum alio viro
- ⁴ itaque fratres mei et vos mortificati estis legi per corpus Christi ut sitis alterius qui ex mortuis resurrexit ut fructificaremus Deo
- ⁵ cum enim essemus in carne passionibus peccatorum quae per legem erant operabantur in membris nostris ut fructificarent morti
- ⁶ nunc autem soluti sumus a lege morientes in quo detinebamur ita ut serviamus in novitate spiritus et non in vetustate litterae
- ⁷ quid ergo dicemus lex peccatum est absit sed peccatum non cognovi nisi per legem nam concupiscentiam nesciebam nisi lex diceret non concupisces
- ⁸ occasione autem accepta peccatum per mandatum operatum est in me omnem concupiscentiam sine lege enim peccatum mortuum erat
- ⁹ ego autem vivebam sine lege aliquando sed cum venisset mandatum peccatum revixit
- ¹⁰ ego autem mortuus sum et inventum est mihi mandatum quod erat ad vitam hoc esse ad mortem
- ¹¹ nam peccatum occasione accepta per mandatum seduxit me et per illud occidit
- ¹² itaque lex quidem sancta et mandatum sanctum et iustum et bonum
- ¹³ quod ergo bonum est mihi factum est mors absit sed peccatum ut appareat peccatum per bonum mihi operatum est mortem ut fiat supra modum peccans peccatum per mandatum
- ¹⁴ scimus enim quod lex spiritalis est ego autem carnalis sum venundatus sub peccato
- ¹⁵ quod enim operor non intellego non enim quod volo hoc ago sed quod odi illud facio
- ¹⁶ si autem quod nolo illud facio consentio legi quoniam bona
- ¹⁷ nunc autem iam non ego operor illud sed quod habitat in me peccatum
- ¹⁸ scio enim quia non habitat in me hoc est in carne mea bonum nam velle adiacet mihi perficere autem bonum non invenio

- ¹⁹ non enim quod volo bonum hoc facio sed quod nolo malum hoc ago
- ²⁰ si autem quod nolo illud facio non ego operor illud sed quod habitat in me peccatum
- ²¹ invenio igitur legem volenti mihi facere bonum quoniam mihi malum adiacet
- ²² condelector enim legi Dei secundum interiorem hominem
- ²³ video autem aliam legem in membris meis repugnantem legi mentis meae et captivantem me in lege peccati quae est in membris meis
- ²⁴ infelix ego homo quis me liberabit de corpore mortis huius
- ²⁵ gratia Dei per Iesum Christum Dominum nostrum igitur ego ipse mente servio legi Dei carne autem legi peccati

CAPITULUM 8

nihil ergo nunc damnationis est his qui sunt in Christo Iesu qui non secundum carnem ambulant

- ² lex enim Spiritus vitae in Christo Iesu liberavit me a lege peccati et mortis
- ³ nam quod impossibile erat legis in quo infirmabatur per carnem Deus Filium suum mittens in similitudinem carnis peccati et de peccato damnavit peccatum in carne
- ⁴ ut iustificatio legis impleretur in nobis qui non secundum carnem ambulamus sed secundum Spiritum
- ⁵ qui enim secundum carnem sunt quae carnis sunt sapiunt qui vero secundum Spiritum quae sunt Spiritus sentiunt
- ⁶ nam prudentia carnis mors prudentia autem Spiritus vita et pax
- ⁷ quoniam sapientia carnis inimicitia est in Deum legi enim Dei non subicitur nec enim potest
- ⁸ qui autem in carne sunt Deo placere non possunt
- ⁹ vos autem in carne non estis sed in Spiritu si tamen Spiritus Dei habitat in vobis si quis autem Spiritum Christi non habet hic non est eius
- ¹⁰ si autem Christus in vobis est corpus quidem mortuum est propter peccatum spiritus vero vita propter iustificationem
- ¹¹ quod si Spiritus eius qui suscitavit Iesum a mortuis habitat in vobis qui suscitavit Iesum Christum a mortuis vivificabit et mortalia corpora vestra propter inhabitantem Spiritum eius in vobis
- ¹² ergo fratres debitores sumus non carni ut secundum carnem vivamus
- ¹³ si enim secundum carnem vixeritis moriemini si autem Spiritu facta carnis mortificatis vivetis
- ¹⁴ quicumque enim Spiritu Dei aguntur hii filii sunt Dei
- ¹⁵ non enim accepistis spiritum servitutis iterum in timore sed accepistis Spiritum adoptionis filiorum in quo clamamus Abba Pater
- ¹⁶ ipse Spiritus testimonium reddit spiritui nostro quod sumus filii Dei
- ¹⁷ si autem filii et heredes heredes quidem Dei coheredes autem Christi si tamen compatimur ut et conglorificemur
- ¹⁸ existimo enim quod non sunt condignae passionis huius temporis ad futuram gloriam quae revelabitur in nobis
- ¹⁹ nam expectatio creaturae revelationem filiorum Dei expectat
- ²⁰ vanitati enim creatura subiecta est non volens sed propter eum qui subiecit in spem

- 21** quia et ipsa creatura liberabitur a servitute corruptionis in libertatem gloriae filiorum Dei
- 22** scimus enim quod omnis creatura ingemescit et parturit usque adhuc
- 23** non solum autem illa sed et nos ipsi primitias Spiritus habentes et ipsi intra nos gemimus adoptionem filiorum expectantes redemptionem corporis nostri
- 24** spe enim salvi facti sumus spes autem quae videtur non est spes nam quod videt quis quid sperat
- 25** si autem quod non videmus speramus per patientiam expectamus
- 26** similiter autem et Spiritus adiuvat infirmitatem nostram nam quid oremus sicut oportet nescimus sed ipse Spiritus postulat pro nobis gemitibus inenarrabilibus
- 27** qui autem scrutatur corda scit quid desideret Spiritus quia secundum Deum postulat pro sanctis
- 28** scimus autem quoniam diligentibus Deum omnia cooperantur in bonum his qui secundum propositum vocati sunt sancti
- 29** nam quos praescivit et praedestinavit conformes fieri imaginis Filii eius ut sit ipse primogenitus in multis fratribus
- 30** quos autem praedestinavit hos et vocavit et quos vocavit hos et iustificavit quos autem iustificavit illos et glorificavit
- 31** quid ergo dicemus ad haec si Deus pro nobis quis contra nos
- 32** qui etiam Filio suo non pepercit sed pro nobis omnibus tradidit illum quomodo non etiam cum illo omnia nobis donabit
- 33** quis accusabit adversus electos Dei Deus qui iustificat
- 34** quis est qui condemnet Christus Iesus qui mortuus est immo qui resurrexit qui et est ad dexteram Dei qui etiam interpellat pro nobis
- 35** quis nos separabit a caritate Christi tribulatio an angustia an persecutio an fames an nuditas an periculum an gladius
- 36** sicut scriptum est quia propter te mortificamur tota die aestimati sumus ut oves occisionis
- 37** sed in his omnibus superamus propter eum qui dilexit nos
- 38** certus sum enim quia neque mors neque vita neque angeli neque principatus neque instantia neque futura neque fortitudines
- 39** neque altitudo neque profundum neque creatura alia poterit nos separare a caritate Dei quae est in Christo Iesu Domino nostro

CAPITULUM 9

Veritatem dico in Christo non mentior testimonium mihi perhibente conscientia mea in Spiritu Sancto

- 2** quoniam tristitia est mihi magna et continuus dolor cordi meo
- 3** optabam enim ipse ego anathema esse a Christo pro fratribus meis qui sunt cognati mei secundum carnem
- 4** qui sunt Israhelitae quorum adoptio est filiorum et gloria et testamenta et legislatio et obsequium et promissa
- 5** quorum patres et ex quibus Christus secundum carnem qui est super omnia Deus benedictus in saecula amen
- 6** non autem quod exciderit verbum Dei non enim omnes qui ex Israhel hii sunt Israhel

⁷ neque quia semen sunt Abrahae omnes filii sed in Isaac vocabitur tibi semen
⁸ id est non qui filii carnis hii filii Dei sed qui filii sunt promissionis aestimantur in semine
⁹ promissionis enim verbum hoc est secundum hoc tempus veniam et erit Sarrae filius
¹⁰ non solum autem sed et Rebecca ex uno concubitu habens Isaac patre nostro
¹¹ cum enim nondum nati fuissent aut aliquid egissent bonum aut malum ut secundum electionem propositum Dei maneret
¹² non ex operibus sed ex vocante dictum est ei quia maior serviet minori
¹³ sicut scriptum est Iacob dilexi Esau autem odio habui
¹⁴ quid ergo dicemus numquid iniquitas apud Deum absit
¹⁵ Mosi enim dicit miserebor cuius misereor et misericordiam praestabo cuius miserebor
¹⁶ igitur non volentis neque currentis sed miserentis Dei
¹⁷ dicit enim scriptura Pharaoni quia in hoc ipsum excitavi te ut ostendam in te virtutem meam et ut adnuntietur nomen meum in universa terra
¹⁸ ergo cuius vult miseretur et quem vult indurat
¹⁹ dicis itaque mihi quid adhuc queritur voluntati enim eius quis resistit
²⁰ o homo tu quis es qui respondeas Deo numquid dicit figmentum ei qui se finxit quid me fecisti sic
²¹ an non habet potestatem figulus luti ex eadem massa facere aliud quidem vas in honorem aliud vero in contumeliam
²² quod si volens Deus ostendere iram et notam facere potentiam suam sustinuit in multa patientia vasa irae aptata in interitum
²³ ut ostenderet divitias gloriae suae in vasa misericordiae quae praeparavit in gloriam
²⁴ quos et vocavit nos non solum ex Iudaeis sed etiam ex gentibus
²⁵ sicut in Osee dicit vocabo non plebem meam plebem meam et non misericordiam consecutam misericordiam consecutam
²⁶ et erit in loco ubi dictum est eis non plebs mea vos ibi vocabuntur filii Dei vivi
²⁷ Esaias autem clamat pro Israhel si fuerit numerus filiorum Israhel tamquam harena maris reliquiae salvae fient
²⁸ verbum enim consummans et brevians in aequitate quia verbum brevium faciet Dominus super terram
²⁹ et sicut praedixit Esaias nisi Dominus Sabaoth reliquisset nobis semen sicut Sodoma facti essemus et sicut Gomorra similes fuissetis
³⁰ quid ergo dicemus quod gentes quae non sectabantur iustitiam adprehenderunt iustitiam iustitiam autem quae ex fide est
³¹ Israhel vero sectans legem iustitiae in legem iustitiae non pervenit
³² quare quia non ex fide sed quasi ex operibus offenderunt in lapidem offensionis
³³ sicut scriptum est ecce pono in Sion lapidem offensionis et petram scandali et omnis qui credit in eum non confundetur

CAPITULUM 10

fratres voluntas quidem cordis mei et obsecratio ad Deum fit pro illis in salutem
² testimonium enim perhibeo illis quod aemulationem Dei habent sed non secundum scientiam
³ ignorantes enim Dei iustitiam et suam quaerentes statuere iustitiae Dei non sunt subiecti

- ⁴ finis enim legis Christus ad iustitiam omni credenti
- ⁵ Moses enim scripsit quoniam iustitiam quae ex lege est qui fecerit homo vivet in ea
- ⁶ quae autem ex fide est iustitia sic dicit ne dixeris in corde tuo quis ascendit in caelum id est Christum deducere
- ⁷ aut quis descendit in abyssum hoc est Christum ex mortuis revocare
- ⁸ sed quid dicit prope est verbum in ore tuo et in corde tuo hoc est verbum fidei quod praedicamus
- ⁹ quia si confitearis in ore tuo Dominum Iesum et in corde tuo credideris quod Deus illum excitavit ex mortuis salvus eris
- ¹⁰ corde enim creditur ad iustitiam ore autem confessio fit in salutem
- ¹¹ dicit enim scriptura omnis qui credit in illum non confundetur
- ¹² non enim est distinctio Iudaei et Graeci nam idem Dominus omnium dives in omnes qui invocant illum
- ¹³ omnis enim quicumque invocaverit nomen Domini salvus erit
- ¹⁴ quomodo ergo invocabunt in quem non crediderunt aut quomodo credent ei quem non audierunt quomodo autem audient sine praedicante
- ¹⁵ quomodo vero praedicabunt nisi mittantur sicut scriptum est quam speciosi pedes evangelizantium pacem evangelizantium bona
- ¹⁶ sed non omnes oboedierunt evangelio Esaias enim dicit Domine quis credidit auditui nostro
- ¹⁷ ergo fides ex auditu auditus autem per verbum Christi
- ¹⁸ sed dico numquid non audierunt et quidem in omnem terram exiit sonus eorum et in fines orbis terrae verba eorum
- ¹⁹ sed dico numquid Israhel non cognovit primus Moses dicit ego ad aemulationem vos adducam in non gentem in gentem insipientem in iram vos mittam
- ²⁰ Esaias autem audet et dicit inventus sum non quaerentibus me palam apparui his qui me non interrogabant
- ²¹ ad Israhel autem dicit tota die expandi manus meas ad populum non credentem et contradicentem

CAPITULUM 11

- d**ico ergo numquid reppulit Deus populum suum absit nam et ego Israhelita sum ex semine Abraham tribu Benjamin
- ² non reppulit Deus plebem suam quam praesciit an nescitis in Helia quid dicit scriptura quemadmodum interpellat Deum adversus Israhel
- ³ Domine prophetas tuos occiderunt altaria tua suffoderunt et ego relictus sum solus et quaerunt animam meam
- ⁴ sed quid dicit illi responsum divinum reliqui mihi septem milia virorum qui non curvaverunt genu Baal
- ⁵ sic ergo et in hoc tempore reliquiae secundum electionem gratiae factae sunt
- ⁶ si autem gratia non ex operibus alioquin gratia iam non est gratia
- ⁷ quid ergo quod quaerebat Israhel hoc non est consecutus electio autem consecuta est ceteri vero excaecati sunt
- ⁸ sicut scriptum est dedit illis Deus spiritum conpunctionis oculos ut non videant et aures

ut non audiant usque in hodiernum diem

⁹ et David dicit fiat mensa eorum in laqueum et in captionem et in scandalum et in retributionem illis

¹⁰ obscurentur oculi eorum ne videant et dorsum illorum semper incurva

¹¹ dico ergo numquid sic offenderunt ut caderent absit sed illorum delicto salus gentibus ut illos aemulentur

¹² quod si delictum illorum divitiae sunt mundi et deminutio eorum divitiae gentium quanto magis plenitudo eorum

¹³ vobis enim dico gentibus quamdiu quidem ego sum gentium apostolus ministerium meum honorificabo

¹⁴ si quo modo ad aemulandum provocem carnem meam et salvos faciam aliquos ex illis

¹⁵ si enim amissio eorum reconciliatio est mundi quae adsumptio nisi vita ex mortuis

¹⁶ quod si delibatio sancta est et massa et si radix sancta et rami

¹⁷ quod si aliqui ex ramis fracti sunt tu autem cum oleaster esses insertus es in illis et socius radicis et pinguidinis olivae factus es

¹⁸ noli gloriari adversus ramos quod si gloriaris non tu radicem portas sed radix te

¹⁹ dices ergo fracti sunt rami ut ego inserar

²⁰ bene propter incredulitatem fracti sunt tu autem fide stas noli altum sapere sed time

²¹ si enim Deus naturalibus ramis non pepercit ne forte nec tibi parcat

²² vide ergo bonitatem et severitatem Dei in eos quidem qui ceciderunt severitatem in te autem bonitatem Dei si permanseris in bonitate alioquin et tu excideris

²³ sed et illi si non permanserint in incredulitate inserentur potens est enim Deus iterum inserere illos

²⁴ nam si tu ex naturali excisus es oleastro et contra naturam insertus es in bonam olivam quanto magis hii secundum naturam inserentur suae olivae

²⁵ nolo enim vos ignorare fratres mysterium hoc ut non sitis vobis ipsis sapientes quia caecitas ex parte contigit in Israhel donec plenitudo gentium intraret

²⁶ et sic omnis Israhel salvus fieret sicut scriptum est veniet ex Sion qui eripiat avertet impietates ab Iacob

²⁷ et hoc illis a me testamentum cum abstulero peccata eorum

²⁸ secundum evangelium quidem inimici propter vos secundum electionem autem carissimi propter patres

²⁹ sine paenitentia enim sunt dona et vocatio Dei

³⁰ sicut enim aliquando et vos non credidistis Deo nunc autem misericordiam consecuti estis propter illorum incredulitatem

³¹ ita et isti nunc non crediderunt in vestram misericordiam ut et ipsi misericordiam consequantur

³² conclusit enim Deus omnia in incredulitatem ut omnium misereatur

³³ o altitudo divitiarum sapientiae et scientiae Dei quam inconprehensibilia sunt iudicia eius et investigabiles viae eius

³⁴ quis enim cognovit sensum Domini aut quis consiliarius eius fuit

³⁵ aut quis prior dedit illi et retribuetur ei

³⁶ quoniam ex ipso et per ipsum et in ipso omnia ipsi gloria in saecula amen

CAPITULUM 12

Obsecro itaque vos fratres per misericordiam Dei ut exhibeatis corpora vestra hostiam viventem sanctam Deo placentem rationabile obsequium vestrum

² et nolite conformari huic saeculo sed reformamini in novitate sensus vestri ut probetis quae sit voluntas Dei bona et placens et perfecta

³ dico enim per gratiam quae data est mihi omnibus qui sunt inter vos non plus sapere quam oportet sapere sed sapere ad sobrietatem unicuique sicut Deus divisit mensuram fidei

⁴ sicut enim in uno corpore multa membra habemus omnia autem membra non eundem actum habent

⁵ ita multi unum corpus sumus in Christo singuli autem alter alterius membra

⁶ habentes autem donationes secundum gratiam quae data est nobis differentes sive prophetiam secundum rationem fidei

⁷ sive ministerium in ministrando sive qui docet in doctrina

⁸ qui exhortatur in exhortando qui tribuit in simplicitate qui praeest in sollicitudine qui miseretur in hilaritate

⁹ dilectio sine simulatione odientes malum adherentes bono

¹⁰ caritatem fraternitatis invicem diligentes honore invicem praevenientes

¹¹ sollicitudine non pigri spiritu ferventes Domino servientes

¹² spe gaudentes in tribulatione patientes orationi instantes

¹³ necessitatibus sanctorum communicantes hospitalitatem sectantes

¹⁴ benedicite persequentibus benedicite et nolite maledicere

¹⁵ gaudere cum gaudentibus flere cum flentibus

¹⁶ id ipsum invicem sentientes non alta sapientes sed humilibus consentientes nolite esse prudentes apud vosmet ipsos

¹⁷ nulli malum pro malo reddentes providentes bona non tantum coram Deo sed etiam coram omnibus hominibus

¹⁸ si fieri potest quod ex vobis est cum omnibus hominibus pacem habentes

¹⁹ non vosmet ipsos defendentes carissimi sed date locum irae scriptum est enim mihi vindictam ego retribuam dicit Dominus

²⁰ sed si esurierit inimicus tuus ciba illum si sitit potum da illi hoc enim faciens carbones ignis congeres super caput eius

²¹ noli vinci a malo sed vince in bono malum

CAPITULUM 13

Omnis anima potestatibus sublimioribus subdita sit non est enim potestas nisi a Deo quae autem sunt a Deo ordinatae sunt

² itaque qui resistit potestati Dei ordinationi resistit qui autem resistunt ipsi sibi damnationem adquirunt

³ nam principes non sunt timori boni operis sed mali vis autem non timere potestatem bonum fac et habebis laudem ex illa

⁴ Dei enim minister est tibi in bonum si autem male feceris time non enim sine causa gladium portat Dei enim minister est vindex in iram ei qui malum agit

⁵ ideo necessitate subditi estote non solum propter iram sed et propter conscientiam

⁶ ideo enim et tributa praestatis ministri enim Dei sunt in hoc ipsum servientes

- ⁷ redde omnibus debitum cui tributum tributum cui vectigal vectigal cui timorem timorem
cui honorem honorem
- ⁸ nemini quicquam debeatis nisi ut invicem diligatis qui enim diligit proximum legem
implevit
- ⁹ nam non adulterabis non occides non furaberis non concupisces et si quod est aliud
mandatum in hoc verbo instauratur diliges proximum tuum tamquam te ipsum
- ¹⁰ dilectio proximo malum non operatur plenitudo ergo legis est dilectio
- ¹¹ et hoc scientes tempus quia hora est iam nos de somno surgere nunc enim propior est
nostra salus quam cum credidimus
- ¹² nox praecessit dies autem adpropinquavit abiciamus ergo opera tenebrarum et induamur
arma lucis
- ¹³ sicut in die honeste ambulemus non in comesationibus et ebrietatibus non in cubilibus
et in pudicitia non in contentione et aemulatione
- ¹⁴ sed induite Dominum Iesum Christum et carnis curam ne feceritis in desideriis

CAPITULUM 14

- I**nfirmum autem in fide adsumite non in disceptationibus cogitationum
- ² alius enim credit manducare omnia qui autem infirmus est holus manducat
- ³ is qui manducat non manducantem non spernat et qui non manducat manducantem non
iudicet Deus enim illum adsumpsit
- ⁴ tu quis es qui iudices alienum servum suo domino stat aut cadit stabit autem potens est
enim Deus statuere illum
- ⁵ nam alius iudicat diem plus inter diem alius iudicat omnem diem unusquisque in suo
sensu abundet
- ⁶ qui sapit diem Domino sapit et qui manducat Domino manducat gratias enim agit Deo et
qui non manducat Domino non manducat et gratias agit Deo
- ⁷ nemo enim nostrum sibi vivit et nemo sibi moritur
- ⁸ sive enim vivimus Domino vivimus sive morimur Domino morimur sive ergo vivimus sive
morimur Domini sumus
- ⁹ in hoc enim Christus et mortuus est et revixit ut et mortuorum et vivorum dominetur
- ¹⁰ tu autem quid iudicas fratrem tuum aut tu quare spernis fratrem tuum omnes enim
stabimus ante tribunal Dei
- ¹¹ scriptum est enim vivo ego dicit Dominus quoniam mihi flectet omne genu et omnis
lingua confitebitur Deo
- ¹² itaque unusquisque nostrum pro se rationem reddet Deo
- ¹³ non ergo amplius invicem iudicemus sed hoc iudicate magis ne ponatis offendiculum
fratri vel scandalum
- ¹⁴ scio et confido in Domino Iesu quia nihil commune per ipsum nisi ei qui existimat quid
commune esse illi commune est
- ¹⁵ si enim propter cibum frater tuus contristatur iam non secundum caritatem ambulas noli
cibo tuo illum perdere pro quo Christus mortuus est
- ¹⁶ non ergo blasphemetur bonum nostrum
- ¹⁷ non est regnum Dei esca et potus sed iustitia et pax et gaudium in Spiritu Sancto
- ¹⁸ qui enim in hoc servit Christo placet Deo et probatus est hominibus

- ¹⁹ itaque quae pacis sunt sectemur et quae aedificationis sunt in invicem
- ²⁰ noli propter escam destruere opus Dei omnia quidem munda sunt sed malum est homini qui per offendiculum manducat
- ²¹ bonum est non manducare carnem et non bibere vinum neque in quo frater tuus offendit aut scandalizatur aut infirmatur
- ²² tu fidem habes penes te ipsum habere coram Deo beatus qui non iudicat semet ipsum in eo quo probat
- ²³ qui autem discernit si manducaverit damnatus est quia non ex fide omne autem quod non ex fide peccatum est

CAPITULUM 15

- d**ebemus autem nos firmiores inbecillitates infirmorum sustinere et non nobis placere
- ² unusquisque vestrum proximo suo placeat in bonum ad aedificationem
- ³ etenim Christus non sibi placuit sed sicut scriptum est inproperia inproperantium tibi ceciderunt super me
- ⁴ quaecumque enim scripta sunt ad nostram doctrinam scripta sunt ut per patientiam et consolationem scripturarum spem habeamus
- ⁵ Deus autem patientiae et solacii det vobis id ipsum sapere in alterutrum secundum Iesum Christum
- ⁶ ut unanimes uno ore honorificetis Deum et Patrem Domini nostri Iesu Christi
- ⁷ propter quod suscipite invicem sicut et Christus suscepit vos in honorem Dei
- ⁸ dico enim Christum Iesum ministrum fuisse circumcisionis propter veritatem Dei ad confirmandas promissiones patrum
- ⁹ gentes autem super misericordiam honorare Deum sicut scriptum est propter hoc confitebor tibi in gentibus et nomini tuo cantabo
- ¹⁰ et iterum dicit laetamini gentes cum plebe eius
- ¹¹ et iterum laudate omnes gentes Dominum et magnificate eum omnes populi
- ¹² et rursus Esaias ait erit radix Iesse et qui exsurget regere gentes in eo gentes sperabunt
- ¹³ Deus autem spei repleat vos omni gaudio et pace in credendo ut abundetis in spe in virtute Spiritus Sancti
- ¹⁴ certus sum autem fratres mei et ego ipse de vobis quoniam et ipsi pleni estis dilectione repleti omni scientia ita ut possitis alterutrum monere
- ¹⁵ audacius autem scripsi vobis fratres ex parte tamquam in memoriam vos reducens propter gratiam quae data est mihi a Deo
- ¹⁶ ut sim minister Christi Iesu in gentibus sanctificans evangelium Dei ut fiat oblatio gentium accepta sanctificata in Spiritu Sancto
- ¹⁷ habeo igitur gloriam in Christo Iesu ad Deum
- ¹⁸ non enim audeo aliquid loqui eorum quae per me non effecit Christus in oboedientiam gentium verbo et factis
- ¹⁹ in virtute signorum et prodigiorum in virtute Spiritus Sancti ita ut ab Hierusalem per circuitum usque in Illyricum repleverim evangelium Christi
- ²⁰ sic autem hoc praedicavi evangelium non ubi nominatus est Christus ne super alienum fundamentum aedificarem

- 21** sed sicut scriptum est quibus non est adnuntiatum de eo videbunt et qui non audierunt intellegent
- 22** propter quod et inpediebar plurimum venire ad vos
- 23** nunc vero ulterius locum non habens in his regionibus cupiditatem autem habens veniendi ad vos ex multis iam annis
- 24** cum in Hispaniam proficisci coepero spero quod praeteriens videam vos et a vobis deducar illuc si vobis primum ex parte fructus fuero
- 25** nunc igitur proficiscar in Hierusalem ministrare sanctis
- 26** probaverunt enim Macedonia et Achaia conlationem aliquam facere in pauperes sanctorum qui sunt in Hierusalem
- 27** placuit enim eis et debitores sunt eorum nam si spiritualium eorum participes facti sunt gentiles debent et in carnalibus ministrare eis
- 28** hoc igitur cum consummavero et adsignavero eis fructum hunc proficiscar per vos in Hispaniam
- 29** scio autem quoniam veniens ad vos in abundantia benedictionis Christi veniam
- 30** obsecro igitur vos fratres per Dominum nostrum Iesum Christum et per caritatem Spiritus ut adiuvetis me in orationibus pro me ad Deum
- 31** ut liberer ab infidelibus qui sunt in Iudaea et obsequii mei oblatio accepta fiat in Hierosolyma sanctis
- 32** ut veniam ad vos in gaudio per voluntatem Dei et refrigerer vobiscum
- 33** Deus autem pacis sit cum omnibus vobis amen

CAPITULUM 16

Commando autem vobis Phoebem sororem nostram quae est in ministerio ecclesiae quae est Cenchrus

- 2** ut eam suscipiatis in Domino digne sanctis et adsistatis ei in quocumque negotio vestri indiguerit etenim ipsa quoque adstitit multis et mihi ipsi
- 3** salutate Priscam et Aquilam adiutores meos in Christo Iesu
- 4** qui pro anima mea suas cervices subposuerunt quibus non solus ego gratias ago sed et cunctae ecclesiae gentium
- 5** et domesticam eorum ecclesiam salutate Ephaenetum dilectum mihi qui est primitivus Asiae in Christo
- 6** salutate Mariam quae multum laboravit in vobis
- 7** salutate Andronicum et Iuniam cognatos et concaptivos meos qui sunt nobiles in apostolis qui et ante me fuerunt in Christo
- 8** salutate Ampliatum dilectissimum mihi in Domino
- 9** salutate Urbanum adiutorem nostrum in Christo et Stachyn dilectum meum
- 10** salutate Apellen probum in Christo
- 11** salutate eos qui sunt ex Aristoboli salutate Herodionem cognatum meum salutate eos qui sunt ex Narcissi qui sunt in Domino
- 12** salutate Tryfenam et Tryfosam quae laborant in Domino salutate Persidam carissimam quae multum laboravit in Domino
- 13** salutate Rufum electum in Domino et matrem eius et meam
- 14** salutate Asyncritum Flegonta Hermen Patrobam Hermam et qui cum eis sunt fratres

- 15** salutate Filologum et Iuliam Nereum et sororem eius et Olympiadem et omnes qui cum eis sunt sanctos
- 16** salutate invicem in osculo sancto salutant vos omnes ecclesiae Christi
- 17** rogo autem vos fratres ut observetis eos qui dissensiones et offendicula praeter doctrinam quam vos didicistis faciunt et declinate ab illis
- 18** huiusmodi enim Christo Domino nostro non serviunt sed suo ventri et per dulces sermones et benedictiones seducunt corda innocentium
- 19** vestra enim oboedientia in omnem locum divulgata est gaudeo igitur in vobis sed volo vos sapientes esse in bono et simplices in malo
- 20** Deus autem pacis conteret Satanam sub pedibus vestris velociter gratia Domini nostri Iesu Christi vobiscum
- 21** salutat vos Timotheus adiutor meus et Lucius et Iason et Sosipater cognati mei
- 22** saluto vos ego Tertius qui scripsi epistulam in Domino
- 23** salutat vos Gaius hospes meus et universae ecclesiae salutat vos Erastus arcarius civitatis et Quartus frater
- 24**
- 25** ei autem qui potens est vos confirmare iuxta evangelium meum et praedicationem Iesu Christi secundum revelationem mysterii temporibus aeternis taciti
- 26** quod nunc patefactum est per scripturas prophetarum secundum praeceptum aeterni Dei ad oboedientiam fidei in cunctis gentibus cognito
- 27** solo sapienti Deo per Iesum Christum cui honor in saecula saeculorum amen

For other languages please go to **www.wordproject.org**